



Broj: 04/1,03/11-05-93 /08
Sarajevo, 28. 4. 2008.

Kolegiju oba doma Parlamentarne skupštine BiH

Delegaciji u Parlamentarnoj skupštini Vijeća Evrope

Kolegiju Sekretarijata Parlamentarne skupštine BiH

**Predmet: IZVJEŠTAJ S DRUGOG DIJELA REDOVNOG ZASJEDANJA
PARLAMENTARNE SKUPŠTINE VIJEĆA EVROPE, Strasbourg, 14.-18. april 2008.**

Drugi dio redovnog zasjedanja Parlamentarne skupštine Vijeća Evrope održan je u Strasbourgu u periodu od 14. do 18. aprila 2008. Na zasjedanju je učestvovala stalna delegacija Parlamentarne skupštine BiH u kojoj su bili:

1. Bakir Izetbegović, predsjedavajući Delegacije,
2. Milica Marković, član,
3. Azra Hadžiahmetović, član,
4. Slavko Matić, član,
5. Savo Erić, zamjenik člana,
6. Edina Hrnjić, sekretar Delegacije,
7. Adnan Bešić, prevodilac.

Glavne teme aprilskog zasjedanja PSVE: *Evropske muslimanske zajednice suočene s ekstremizmom, Zloupotreba sistema krivične pravde u Bjelorusiji, Pristup sigurnom i legalnom abortusu u Evropi, Posljedice proglašenja nezavisnosti Kosova, Samoubistva djece i tinejdžera u Evropi – ozbiljan problem javnog zdravlja, Funkcioniranje demokratskih institucija u Armeniji, Pristupanje EU Evropskoj konvenciji o ljudskim pravima, Imigracija iz subsaharske Afrike, Održivi razvoj i turizam.*

Zasjedanje je otvorio gosp. Lluís Maria de Puig, predsjednik Parlamentarne skupštine Vijeća Evrope. De Puig je istakao da su od januarskog zasjedanja PSVE evropsko jedinstvo iskušala dva događaja: proglašenje nezavisnosti Kosova od Skupštine Kosova, te razlike koje su se pojavile među zemljama članicama Vijeća Evrope na samitu NATO-a u Bukureštu. Prema mišljenju gosp. De Puiga, u ovom trenutku nemoguće je dati cjelovite odgovore na mnoga pitanja koja su nastala u vezi s ova dva događaja, a posebno na pitanje da li se zapravo nalazimo u procesu stvaranja novih podjela u Evropi.

Prvog dana zasjedanja Skupštini se obratio i Ivan Gašparović, predsjednik Slovačke, koji je, govoreći o ulozi VE, izjavio da se glas Vijeća Evrope sve manje čuje i da je njegova budućnost isključivo u jačanju i provođenju osnovnih vrijednosti na kojima počiva.

Drugi dan zasjedanja obilježen je debatom o evropskim muslimanskim zajednicama suočenim s ekstremizmom. Na osnovu izvještaja gosp. João Bosco Mota Amarala, parlamentarci su zatražili od evropskih vlada da se pozabave uzrocima ekstremizma, diskriminacije, socijalnog isključenja, te da promoviraju integraciju i političku i građansku participaciju imigranata. Parlamentarna skupština Vijeća Evrope pozvala je zemlje članice da se zajedno s muslimanskim zajednicama bore protiv političkog ekstremizma koji se poziva na islam. U jednoglasno usvojenoj rezoluciji Skupština poziva vlade zemalja članica da se bore protiv islamofobije, da preduzimaju akcije protiv govora mržnje i osiguraju poštivanje ljudskih prava prilikom provođenja antiterorističkih mjera.

U nastavku zasjedanja Skupštini se obratila gđa Angela Merkel, kancelarka SR Njemačke. U svom govoru gđa Merkel posebno je naglasila potrebu reforme Evropskog suda za ljudska prava, te pozvala Evropsku uniju da usvoji Evropsku konvenciju o ljudskim pravima VE, kako bi "obični ljudi u EU" bili u mogućnosti uložiti žalbu čak i protiv Brisela pred Evropskim sudom za ljudska prava. Gđa Merkel istakla je i ulogu VE kao nezamjenjivog čuvara zajedničkih vrijednosti, posebno kada su u pitanju borba protiv terorizma i zaštita manjinskih prava. U borbi protiv terorizma, kako je istakla, sigurnosni zahtjevi moraju biti u ravnoteži sa zaštitom individualnih prava, a kada je riječ o pravima manjina, gđa Merkel pozvala je na jačanje dijaloga kako bi se uspostavila ravnoteža između autonomije manjina i nacionalne kohezije.

Treći dan zasjedanja protekao je u svjetlu debate o pravu žena na siguran i legalan abortus. Veliki broj parlamentaraca saglasio se s tvrdnjom da abortus treba izbjegavati što je moguće više, te da ga ni u kojem slučaju ne treba posmatrati kao metod planiranja porodice. Praksa je, međutim, pokazala da potpuna zabrana abortusa nije rezultirala smanjenjem njihovog broja, već je dovela do velikog broja traumatičnih i ilegalnih abortusa. Gđa Gisela Wurm, izvjestilac o ovoj temi, istakla je da je u većini evropskih zemalja zakonom dozvoljen abortus kako bi se spasio život majke, kao i abortus iz drugih razloga, osim u Andori, Irskoj, Malti, Monaku i Poljskoj. Parlamentarna skupština Vijeća Evrope usvojila je nakon rasprave rezoluciju kojom poziva zemlje članice u kojima je abortus zabranjen da ga učine legalnim u razumnim granicama u pogledu mjeseci trudnoće, te da garantiraju ženama pravo na siguran i legalan abortus. Parlamentarci su usvojenom rezolucijom također pozvali na provođenje edukacije u školama kako bi se izbjegle neželjene trudnoće i abortusi.

Nastavak zasjedanja obilježen je obraćanjima gđe Yulie Timoshenko, premijerke Ukrajine, te gosp. Amina Maaloufa. Pored toga, komesar Vijeća Evrope za ljudska prava g. Thomas Hammarberg prezentirao je Parlamentarnoj skupštini Vijeća Evrope svoj godišnji izvještaj. Komesar Hammarberg izdvojio je nekoliko zabrinjavajućih problema u vezi s ljudskim pravima u zemljama članicama VE među kojima su:

- nepoštivanje prava migranata u Evropi, posebno ilegalnih migranata od kojih su neki i žrtve trgovine ljudima,
- problem ksenofobije – mnoge grupe ljudi su diskriminirane i ne podstiču se na integraciju u društvo,
- diskriminacija Roma na tržištu rada i u pogledu stambenih prava, te problem u vezi sa školovanjem romske djece,
- diskriminacija pojedinaca na osnovu njihove seksualne orijentacije,
- nedovoljna zaštita prava invalidnih lica, te zastrašujući uslovi u psihijatrijskim bolnicama u nekim zemljama članicama VE,
- potreba za većom zaštitom prava djece i garantiranje jednakosti spolova,

- neophodnost reformi u nekim zemljama Evrope kako bi se osigurala nezavisnost pravosuđa i pravosudni sistem zaštititi od korupcije,
- pretrpanost zatvora i neprihvatljivi uslovi u kojima pritvorenici borave,
- krhkost slobode izražavanja i prečesta upotreba kriminalnih djela protiv novinara.

Komesar Hammarberg naglasio je da parlamentarci imaju ključnu ulogu u ratificiranju pravnih instrumenata koji doprinose većem poštovanju ljudskih prava, te da su oni, s obzirom da imaju političku vlast i presudnu ulogu u donošenju zakona i nadzoru nad izvršnom vlasti, glavni partner komesaru za ljudska prava.

Delegacija Parlamentarne skupštine BiH pri Parlamentarnoj skupštini Vijeća Evrope prisustvovala je sastanku Monitoring komiteta PSVE, održanom 15. aprila 2008. Iako Delegacija PSBiH nema svog predstavnika u Monitoring komitetu, dnevnim redom Komiteta predviđena je razmjena mišljenja sa članovima Delegacije s obzirom da su koizvjestioci Monitoring komiteta pripremili Nacrt izvještaja o napretku BiH i njenom ispunjavanju postprijetnih obaveza. Članovi Delegacije prezentirali su ukratko komentare na Nacrt izvještaja, te su se obavezali na dostavljanje komentara u pisanoj formi kako bi primjedbe i sugestije bile unesene u Nacrt izvještaja, a o čemu će se razgovarati i prilikom posjete koizvjestilaca gosp. Civasoglua i gosp. Sasija Bosni i Hercegovini sredinom maja. Planirano je da konačni izvještaj Monitoring komiteta PSVE o BiH bude uvršten na dnevni red junskog zasjedanja PSVE, gdje će nakon održane rasprave Parlamentarna skupština Vijeća Evrope usvojiti rezoluciju o napretku u Bosni i Hercegovini.

Pripremila: Edina Hrnjić

Odobrio: Bakir Izetbegović

Sekretar Delegacije

Predsjedavajući Delegacije

Kopija: Sekretarima Komisije za vanjske poslove Predstavničkog doma PS BiH i Komisije za vanjsku i trgovinsku politiku, carine, saobraćaj i komunikacije Doma naroda PS BiH